



**USAID**  
HUSI POVU AMERIKANU



## REVISTA SITUASAUN - OUTUBRU 2015

### ASUNTU NE'EBÉ PRESIZA TAU ATENSAUN

- ▶ **Disputa Bee Moos Akontese ho Número Aas iha fulan Setembru no Outubru 2015, no barak liu dala rua kompara ho fulan hanesan iha 2014;**
- ▶ **Estudante Envolve iha Insidente Violénsia Rejista ho Número Aas Liu iha fulan Outubru Kompara ho fulan Sira Antes;**
- ▶ **Grupu Joven Asaltu Malu iha Fatuberliu - Manufahi, no Hamosu Preokupasaun ba Komunitade.**

#### DISPUTA BEE MOOS AKONTESE HO NÚMERU AAS IHA FULAN SETEMBRU NO OUTUBRU 2015, NO BARAK LIU DALA RUA KOMPARA HO FULAN HANESAN IHA 2014

Belun ho nia programa Atensaun no Responde Sedu (AtReS) iha fulan Outubru 2015 rekolla insidente violénsia hamutuk 111. Insidente violénsia sériu uitoan ne'ebé akontese mak problema tanba bee moos ka hadau malu kuru bee ne'ebé rejista insidente 6 akontese iha Setembru no 6 iha Outubru 2015. Número ne'e barak liu dala rua husi insidente ne'ebé akontese iha fulan Setembru no Outubru 2014, ne'ebé akontese insidente 3 kada fulan. Hanesan bai-bain tempu bailoro, bee ne'ebé menus no maran dala barak hamosu problema entre komunitade sira. Iha loron 27 Outubru, akontese insidente violénsia maun no alin baku malu tanba hadau malu bee moos iha Suku Duyung, Postu Administrativa Metinaro, Munisipiu Dili. Momentu ne'ebá Alin enxe hela bee ho mangeira, maibé tanba seidak nakonu hotu, no maun ba muda fali mangeira ne'e hodi dada ba nia uma. Ho ida ne'e mak maun no alin ne'e hirus malu to'o baku malu no tuda malu ho fatuk. Impaktu husi insidente ne'e, maun nia ain karuk hetan kanek no aleza, nune'e labele la'o ho di'ak. Polísia mak halo intervensaun ba kazu ne'e.

Insidente liga ba disputa bee moos akontese iha Munisipiu Dili hamutuk insidente 4, Munisipiu Ainaro insidente 1 no insidente 1 seluk akontese iha Munisipiu Manatutu.

Totál Insidente Violénsia fulan Outubru 2015	
Munisípiu	Insidente
Aileu	6
Ainaru	10
Baukau	8
Bobonaru	4
Covalima	5
Dili	39
Ermera	1
Lautein	5
Likisá	7
Manatutu	3
Manufahi	9
Oekusi	2
Vikeké	12
<b>Totál</b>	<b>111</b>

### ESTUDANTE ENVOLVE IHA INSIDENTE VIOLENSIA REJISTA HO NÚMERU AAS LIU IHA FULAN OUTUBRU KOMPARA HO FULAN SIRA ANTES

Iha fulan Outubru, liu husi monitorizasaun programa AtReS rekolla insidente violénsia 12 husi totál insidente 111 ne'ebé envolve estudante iha violénsia. Número ida ne'e konsidera aas liu kompara ho número iha fulan sira liu ba ho médiu/average (rata-rata) insidente 6.2 kada fulan. Iha insidente ida ne'ebé akontese iha Eskola Sekundária Finantil Ai-mutin, Comoro no hamosu tan insidente 2 seluk. Kronolojia husi insidente ne'e mak: Iha loron 28 Outubru, maizumenus tuku 09.30 dadeer, grupu joven ba baku estudante ida ho kadeira iha Eskola laran hodi halo estudante ne'e nia isin bubu hotu. Hafoin iha loron 30 Outubru 2015, iha tuku 11.30 dadeer akontese ema deskoñesidu hana estudante Finantil feto ida ho rama ambon iha Aldeia Ai-mutin, Suku Comoro, Postu Administrativa Dom Aleixo, ne'ebé rama kona iha estudante ne'e nia ain no lori kedas ba HNGV. Insidente seluk ne'ebé liga ba insidente rua seluk mak iha loron 31 Outubru 2015, iha tuku 11.30 dadeer akontese estudante tuda malu bainhira eskola remata. Insidente ne'e hanesan kontinuasaun husi insidente rua seluk tanba Estudante husi Eskola Finantil deskonfia Estudante husi Eskola 10 Dezembru mak hana sira nia kolega feto ho rama ambon. Kauza husi tuda malu entre estudante ne'e mak halo komunitade sira pániku no hamosu engarrafamentu ba transporte.

Dadus hatudu katak insidente violénsia entre estudante hamutuk 5 mak akontese iha Dili, 3 iha Munisipiu Bobonaru, 2 iha Munisipiu Lautein no 2 seluk iha Munisipiu Vikeké.

#### GRUPU JOVEN ASALTU MALU IHA FATUBERLIU – MANUFAHI NO HAMOSU PREOKUPASAUN BA KOMUNITADE

Monitorizasaun programa AtReS iha fulan Outubru mós rekolla insidente violénsia 43 husi total insidente 111 ne'ebé iha relasaun ho violénsia entre juventude. Número ida ne'e konsidera aas liu kompara ho fulan sira antes ne'ebé ho médiu/average (rata-rata) insidente 24.6 kada fulan. Iha insidente sériu ida mak akontese iha loron 5 Outubru, maizumenus tuku 11.00 kalan iha Suku Fatukahi, Postu Administrativa Fatuberliu, Munisipiu Manufahi. Momentu ne'ebá iha grupu joven husi Fatukahi ho besi kanu baku mane na'in rua husi Caicasa, ne'ebé ba partisipa festa graduasaun SOLS nian. Iha akontesimentu ne'e, joven sira baku mane ida to'o monu ba rai no tuku mane ne'e niaibun ho fatuk, maibé mane na'in rua ne'e konsege salva-an no foti motor halai hodi ba halo tratamentu iha Sentru Saúde Caicasa.


Liga ho insidente iha leten, iha loron 11 Outubru, joven na'in rua husi Fatukahi atu ba sosa tua mutin iha Caicasa mak mane ne'ebé joven sira baku iha Fatukahi ne'e nia alin ida mak hapara joven na'in rua hodi baku sira. Relasiona ho insidente ne'e mak hamosu reasaun husi joven Fatukahi ne'ebé hakarak ba asalta komunidadade Caicasa. Maibé Polísia husi Eskuadra Fatuberliu no Membru F-FDTL husi Postu Betano mak halo intervensaun lalais hodi halo atuasaun no haruka fila joven no komunidadade parte rua ba ida-idak nia uma.

### NÚMERU INSIDENTE IHA MUNISIPIU DILI HUSI FULAN MAIU TO'O OUTUBRU 2015


Postu Administrativu	Maiu-15	Jun-15	Jul-15	Aug-15	Set-15	Out-15	Total
Atauro	0	2	4	5	4	3	18
Cristo Rei	8	11	8	12	18	2	59
Dom Aleixo	18	26	11	16	10	8	89
Metinaro	0	2	1	0	3	2	8
Nain Feto	2	3	3	2	4	9	23
Vera Cruz	19	10	2	7	6	15	59
<b>Total</b>	<b>47</b>	<b>54</b>	<b>29</b>	<b>42</b>	<b>45</b>	<b>39</b>	<b>256</b>

### KARATERÍSTIKA INSIDENTE


Total Insidente: Outubru 2015




### Insidente Fatin




### Metodu Violensia




### Tipu Violensia



### See Mak Hahu / Halo Violensia?




### Hun no Abut Konflitu




### Ena Ne'ebe Hahu Violensia Nia Jeneru saida?




### See Mak Responde?



### Vítima Nia Jeneru Saida?





## ATIVIDADE PREVENSAN NO RESPONDE BA KONFLITU

### Atividade Ne'ebé Hala'ó Husi Ekipa Atensaun no Responde Sedu (AtReS)

▶ Atu Hasa'e Kapasidade Estrutura Rede Prevensaun no Responde Konfliktu (RPRK), Lider Komunitária, Juventude no Estudante sira mak ONG Belun hamutuk ho Ministériu Solidariedade Sosiál (MSS) liu husi Dirasaun Harii Paz no Koezaun Sosiál (DHPKS) fasilita treinamentu kona-ba Mediasaun no Negosiasaun iha Postu Administrativa Alas, Munisipiu Manufahi. Treinamentu ne'e hala'ó husi loron 05 - 06 Outubru 2015. Treinamentu ne'e importante tebes tanba knaar ida ne'e baibain hala'ó duni husi lider lokál sira iha baze, no atu haforsa no haklean sira nia kbiit ba rezolve problema liu husi mediasaun no negosiasaun.



▶ Liu husi Rede Prevensaun no Responde Konfliktu (RPRK) Postu Administrativa Ossu, Munisipiu Vikeké organiza eventu integradu ho parte Governu lokál no Polisia Nasionál Timor-Leste (PNTL) hodi halo diálogu aberta iha Suku Uaibobo. Diálogu ne'ebé hala'ó iha loron 09 Outubru 2015 ne'e ho intensaun halo sosialisasaun hodi fahe informasaun ba comunidade atu hasa'e sira nia koñesimentu no bele partisipa direta ba prosesu dezenvolvimentu iha rai laran. Alende ne'e bele kria estabilidade, hamenus konfliktu iha comunidade no fó espasu ba comunidade nia moris di'ak iha família.



▶ Atu kapasita no aumenta kompiensaun comunidade no lider lokál sira ba programa governu nian liga ba Estatutu Illa Ataúro mak ONG Belun liu husi Rede Prevensaun no Responde Konfliktu (RPRK) Rede Tuk-Tete Postu Administrativa Ataúro, Munisipiu Dili hala'ó semináriu iha loron 30 Outubru 2015. Semináriu ho tema **"Perspetiva Dezenvolvimentu iha Illa Ataúro hanesan Zona Ekonomia Espesial"** ne'e ho objetivu identifika hanoin husi comunidade no sosiedade sivil liga ba programa dezenvolvimentu sustentável no estabelese meius komunikasaun ne'ebé konstrutivu entre comunidade no governu hodi prevene konfliktu iha futuru relasiona ho estatutu Illa Atauro.



### Atividade Ne'ebé Hala'ó Husi Ekipa Mediasaun no Rezolusaun ba Disputa (MRD)

▶ Atu haforsa lider lokál iha parte mediasaun problema rai, Belun liu husi ekipa MRD fasilita treinamentu kona-ba Transformasaun Konfliktu, Mediasaun-Negosiasaun no Arbitrazen iha loron 27-29 Outubru 2015 iha Edifísiu DTP Baukau. Treinamentu ne'e oferese ba Membru Konsellu Suku 5 iha Postu Administrativa Baukau hanesan Suku Bahu, Tirilolo, Triloka no Buruma. Partisipante hamutuk ema na'in 19 ne'ebé kompostu husi feto 6 no mane 13.

## KONA-BA REVISTA NE'E

Revista situasaun ne'e relata kona-ba asuntu xave relasiona ho insidente violénsia no tendénsia konfliktu husi koleasaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha postu administrativu 43, suku 208, husi Postu Administrativa 65 iha Timor-Leste durante Outubru 2015. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus ne'ebé ami iha, liu husi sistema AtReS.

**Marilia Oliveira da Costa**, Jestor Sistema AtReS: [bylah.belun@gmail.com](mailto:bylah.belun@gmail.com)

**Laurensius Lein**, Especialista Prevensaun Konfliktu & Política: [laurensius.belun@gmail.com](mailto:laurensius.belun@gmail.com)